

Malaysia mahu labur di barat

BH 16 NOV 2000

Daripada Azizi Othman dan Lichong Angkui

BANDAR SERI BEGAWAN: Malaysia berminat melabur secara besar-besaran di barat China, yang kini paling giat dimajukan oleh kerajaan negara itu menerusi dasar "Go-West" (pergi ke Barat).

Datuk Seri Dr Mahathir Mohamad berkata, Malaysia berminat melabur di barat China terutama dalam sektor berasaskan makanan bagi membantu membangunkan wilayah terbabit serta menggerakkan pertumbuhan ekonominya.

Perdana Menteri berkata, beliau memaklumkan kesanggupan Malaysia itu dalam pertemuan dua halanya dengan Presiden China, Jiang Zemin, di Orchid Grand Hotel, di sini, hari ini.

China melaksanakan dasar "pergi ke Barat" yang



membabitkan usaha menggalakkan pelabur asing ke wilayah itu sebagai satu daripada strategi meminimumkanberulangnya risikocrisis ekonomi yang melanda Asia.

Menerusi dasar itu, beberapa lokasi di wilayah Barat China yang masih mundur tetapi kaya dengan sumber asli dikenal pasti dan akan dimajukan secara usaha sama antara pihak berkuasa setem-

pat dengan pelabur asing.

Menurut Perdana Menteri, Malaysia akan memberi tumpuan pelaburan khusus kepada sektor pengeluaran dan pemprosesan makanan sejajar penekanan China terhadap bidang itu bagi memenuhi keperluan penduduknya.

Dr Mahathir berkata, dalam pertemuannya dengan presiden itu hari ini, beliau dimaklumkan mengenai usaha kerajaan

China memberi tumpuan di kawasan Barat yang belum begitu membangun untuk program pengeluaran makanan.

"Mereka (China) mempelawa penyertaan pelabur asing dan kita nyatakan bahawa jika ada peluang, kita berminat untuk mengambil bahagian," katanya ketika ditemui wartawan Malaysia selepas pertemuan kira-kira 20 minit itu.

Dr Mahathir dan Zemin tiba di sini malam tadi untuk menghadiri sidang kemuncak tidak rasmi dua hari ketua negara Kerjasama Ekonomi Asia Pasifik (Apec) kelapan yang akan berakhir esok.

Perdana Menteri berkata dalam pertemuan itu, mereka turut membincang soal kepentingan dua hala Malaysia-China secara

umum dan mengenai pengurusan ekonomi dan kewangan negara.

Selain itu, katanya, mereka membincang mengenai Pertubuhan Perdagangan Dunia (WTO), mata wang dan kenapa perlu ada kadar tukaran mata wang tetap.

"Beliau (Zemin) sendiri bersetuju perlunya kita mengurus mata wang sendiri. Beliau juga menyatakan pentingnya Malaysia dan China untuk terus menjalin hubungan baik," katanya.

Dr Mahathir berkata, dalam pertemuan itu Zemin memberitahunya bahawa Perdana Menteri China, Zhu Rongji amat berminat untuk menemuinya dalam Sidang Kemuncak Asean yang akan diadakan di Singapura, minggu depan.